

Galicia Encantada



ANIVERSARIO
2005 ✻ 2025
Enciclopedia de Fantasía Popular de Galicia

Morte

CATEGORÍAS RELACIONADAS

O crime da Legua Dereita



Sucedeu na noite do 21 ao 22 de maio de 1911, onde chaman a Legua Dereita, lugar pertencente á parroquia de Nete, concello de Vilalba (na imaxe a casa da vítima). Ao amencer do 22 de maio atoparon o corpo dun veciño do lugar, chamado Ángel Castro Cabarcos, morto e desfigurado. Todo parecía indicar que fora esfolado por uns sacamanteigas, homes do unto ou sacaúntos tan crueis e sanguinarios coma os retratados nos clásicos do xénero.

VECIÑOS Todos os implicados no suceso eran veciños e coñecidos, mesmo compañeiros na

cuadrilla de segadores que ían cada verán segar a Castela.

O CRIME Na noite do día 21 de maio Bautista Roca Felpeto e tres compinches máis tivéronlle o camiño a Ángel Castro Cabarcos entre Fonfría e a Legua Dereita. Parece que foi Bautista o que lle disparou, e o que con unha ferramenta lle cortou as orellas, arrincoulle os ollos e pel da cara.

A LENDA En Humanes, Madrid, a esposa do patrón que os contrataba cada ano pola sega levaba un tempo padecendo un cancro de pel que lle afectaba ao rostro. Os médicos non lle daban esperanzas e un curandeiro que consultou recomendoulle como último remedio posible poñer sobre a parte enferma o peleso da cara dun home desbarbado, sempre e cando a pel lle fose arrincada en vivo.



O patrón elixiu como vítima a Cabarcos, un home corpulento pero que cumpría a principal recomendación do curandeiro, que fose lampo de cara. E para executar a macabra encomenda contratou a Bautista Roca, de Ínsua, maioral da cuadrilla, sospeitoso autor doutro crime anterior e inimigo declarado de Cabarcos.

Disque mentres o esfolaban, os seus berros deberon atronar de tal maneira toda a Chaira que o tiveron que rematar con dous tiros de escopeta polas costas. Cando chegou a pel a Humanes uns dous meses despois envolta nuns coiros de xamón, a enferma xa morrera e non a precisaba.



Non hai unha soa proba de que isto fose así, mais crenzas moi antigas, ben arraigadas, están tras do mito que considera que o corpo humano e as súas partes, órganos ou fluidos, poden ser eficaces remedios curativos para determinadas doenzas.

Dos tres ou catro implicados no macabro crime, todos veciños das parroquias de Ladra e Ínsua, un fuxiu a Cuba e os outros foron detidos aínda que só Bautista foi condenado a 28 anos de cárcere.

BIBLIOGRAFÍA

José de Cora «La verdad, y sólo la verdad, del crimen de Legua Dereita», *El Progreso*, 19.10.2013. ([enlace web](#))

COMENTARIOS ENVIADOS

E certo que hai unha cruz á esquerda vindo de Vilalba, pero non é a que recorda ao crime de Cabarcos. Esa está un pouco máis adiante da súa casa, preto dun espazo que arranxaron non hai moito para depositar escombros e outros residuos.

Enviado por Gelucha o 07/08/2013 ás 12:47:51

Esqueceume dicir que non é ningunha lenda, foi un feito real, por moi macabro que poida parecer.

Enviado por Gelucha o 07/08/2013 ás 12:48:56

É anecdótico, cando menos, que esta sexa a única lenda que eu coñezo que non posúe versións, aínda dada a súa oralidade. Todas as voces nas que a oín coinciden; algunhas non posúen datos de nomes, mais contan con todos os feitos narrados e coas personaxes protagonistas dos mesmos.

Todo isto fai supor que, máis que dunha lenda propiamente dita, se trate da relación de feitos reais, aínda que a día de hoxe non teñamos probas que aportar nin testemuñas vivas dos feitos narrados.

Enviado por María Xosé Lamas o 03/05/2010 ás 13:31:51

Na Legua Dereita hai unha cruz que se ve dende a carretera que vai de Vilalba a Rábade, do lado dereito vindo dende Vilalba.

E a casa está do lado esquerdo o final da recta, que e a da foto....

Polo que todo indica que e unha narración do macabro incidente...

Enviado por Naranxo o 30/09/2010 ás 20:34:22

Miña nai contouma así como se narra, anque sen os detalles de Madrid. Pasado o tempo coñecín tamén a un neto (hoxe falecido) de Bautista, que se declaraba honroso (?) descendente daquel asasino.

Enviado por Abel o 05/10/2015 ás 20:23:16

Esta lenda sempre a conta a minha avoa de Oleiros (Vilalba) quando imos em carro por alí, mas non sabia a historia completa, e com tantos detalles.

Obrigada.

Enviado por Conchi o 02/05/2010 ás 21:16:52

A historia non lendaria dos acontecementos:

<http://elprogreso.galiciae.com/nova/284838-verdad-verdad-crimen-legua-dereita>

Enviado por Cora o 26/11/2014 ás 10:15:27